

Euronews informa

Medaie de Provincie a Marino Tremonti

A 40 agns de nassite dal comitât pe universitât furlane la provincie e fâs onôr al so president

Cu la consegne de medaie de provincie al dot. Marino Tremonti, o vin volût fâ onôr al Comitât pe Universitât furlane a 40 agns de sô nassite».

A son passâts un grum di agns ma pal president de Provincie di Udin on. Pietro Fontanini «nol va dismenteât l'organisim e i oms che lu àn metût adun par movi dal imobilisim e de apatie i furlans e par incidi in maniere impuartante ancje sui parfîts une vore contraris al disvilup universitari fûr de citât di Triest». Par celebrâ chest impuartant travuart, par tant, une cerimonie ufi-ciâl a palaç Belgrât dulà che a àn partecipât, di là di ducj chei altris, ancje l'atuâl retôr dal ateneu furlan, Cristiana Compagno e cualchidun di chei che prin di jê a àn vude cheste incarghe: mons. Franco Frilli, Marzio Strassoldo e Furio Honsell. «Vuê - al à continuât Fontanini - il dot. Marino Tremonti al rapresente chei che a àn lotât par istituî la Universitât ancje a Udin. Cuietri la ostilitât di cierts parfîts e tal cûr la voie di fâ justizie, garantint ai furlans, fin a chel moment destinâts seont lis antighis logjichis triestinis, "a lâ a fâ fen su lis monts" o fâ "lis massariis", la



6 marzo 1978. Roma: la manifestazione davanti a Palazzo Chigi

pussibilitât di acedi a cierts professions. La consegne di cheste medaie al dot. Marino Tremonti - al à comentât - e à par tant un valôr simbolic, slargiât a cui che cun continuitât e coerence al operâ par dâ al Friûl il so ateneu, par vê savût tirâ dongje lis

istancis de int e, infin, par continuâ a rapresentâ il comitât che al à lotât par che ancje i furlans a rivassin "di bessôi" a contribuî ae cressite de lôr tiere». Tal cors de cerimonie e je stade percorude la storie dal ateneu furlan, che, a diference di altris universitâts in Italie, e à une carateristiche dal sigûr peculiâr: e je la uniche universitât istituide par volontât populâr. A forin ben 125.000 lis firmis su la propueste di leç di iniziative populâr pe istituzion de Universitât dal Friûl, cetantis cjapadis sù propit di bande dai components dal comitât, tes tendopolis daspò dal taramot dal 1976. Une grande partecipazion che e testemonee la volontât dai furlans di scometi sul propri avignî tacant de alte formazion, de cognossince, dai zovins. La prime leç su la ricostruzion dal Friûl e sancì la nassite de Universitât dai Studis di Udin tal 1978. «E cu la nassite de Universitât dal Friûl - al à zontât Fontanini - si è realizât chel che al veve profetizât Pre Checo Placerean "Jessî dal taramot cul cjâf e no cui pîts". Frase - al à sierât - che e podarès jessî doprade ancje in di di vuê, in plene crisi economiche ».